

摘藻堂四庫全書薈要

史部

欽定四庫全書薈要

史部  
通志卷一百二下



詳校官員外郎臣楊世綸


欽定四庫全書薈要卷九千十

史部

通志卷一百二下

宋右廸功郎鄭樵漁仲撰

東列傳第十五下

  
字子雲長安人也父吉為衛司馬使送郅支單于  
侍子為郅支所殺語在陳湯傳永少為長安小史後博  
學經書建昭中御史大夫繁延壽聞其有茂材除補屬  
舉為太常丞數上疏言得失建始三年冬日食地震同

日俱發詔舉方正直言極諫之士太常陽城侯劉慶忌

舉永待詔公車對曰臣聞明王即位正五事建大中以

承天心則庶徵序於下日月理於上如人君淫溺後宮

般樂游田五事失於躬大中之道不立則咎徵降而六

極至凡災異之發各象過失以類告人乃十二月朔戊

申日食婺女之分地震蕭牆之內二者同日俱發以丁

寧陛下厥咎不遠宜厚求諸身意豈陛下志在閨門未

郵政事不慎舉錯婁失中與內寵大盛女不遵道嫉妬

專上妨繼嗣與古之王者廢五事之中失夫婦之紀妻妾得意謁行於內執行於外至覆傾國家或亂陰陽昔褒姒用國宗周以喪閭妻驕扇日以不臧此其效也經曰皇極皇建其有極傳曰皇之不極是謂不建時則有日月亂行陛下踐至尊之祚為天下主奉帝王之職以統羣生方內之治亂在陛下所執誠留意於正身勉彊於力行損燕私之間以勞天下放去淫溺之樂罷歸倡優之笑絕卻不享之義慎節游田之虞起居有常循禮

而動躬親政事致行無倦安服若性經曰繼自今嗣王其毋淫于酒毋逸于遊田惟正之共未有身治正而臣下邪者也夫妻之際王事綱紀安危之機聖王所致慎也昔舜飭正二女以崇至德楚莊忍絕丹姬以成伯功幽王惑於褒姒周德降亡魯桓脅於齊女社稷以傾誠修後宮之政明尊卑之序貴者不得嫉妬專寵以絕驕嫚之端抑褻闇之亂賤者咸得秩進各得厥職以廣繼嗣之統息白華之怨後宮親屬饒之以財勿與政事以

遠皇父之類捐妻黨之權未有閨門治而天下亂者也

治遠自近始習善在左右昔龍筦納言而舜命惟允四  
輔既備成王靡有過事誠勅正左右齊粟之臣戴金貂  
之飾執常伯之職者皆使學先王之道知君臣之義濟  
濟謹孚無敖戲驕恣之過則左右肅艾羣僚仰法化流  
四方經曰亦惟先正克左右未有左右正而百官枉者  
也治天下者尊賢考功則治簡賢違功則亂誠審思治  
人之術歡樂得賢之福論材選士必誠於職明度量以

程能考功實以定德無用比周之虛譽毋聽寢潤之譖  
愬則抱功修職之吏無蔽傷之憂比周邪偽之徒不得  
即工小人日銷俊又日隆經曰三載考績三考黜陟幽  
明又曰九德咸事俊又在官未有功賞得於前衆賢布  
於官而不治者也堯遭洪水之災天下分絕為十二州  
制遠之道微而無乖畔之難者德厚恩深無怨於下也  
秦居平土一夫大呼而海內崩析者刑罰深酷吏行殘  
賊也夫違天害德為上取怨於下莫甚乎殘賊之吏誠



放退殘賊酷暴之吏錮廢勿用益選溫良上德之士以親萬姓平刑釋寃以理民命務省繇役毋奪民時薄收賦稅毋殫民財使天下黎元咸安家樂業不苦踰時之役不患苛暴之政不疾酷烈之吏雖有唐堯之大災民無離上之心經曰懷保小人惠于鰥寡未有德厚吏良而民畔者也臣聞災異皇天所以譴告人君過失猶嚴父之明誠畏懼敬改則禍銷福降忽然簡易則咎罰不除經曰饗用五福畏用六極傳曰六沴作見若不共御

六罰既侵六極其下今三年之間災異鋒起小大畢具  
所行不享上帝上帝不豫炳然甚著不求之身無所改  
正疏舉廣謀又不用其言是循不享之迹無謝過之實  
也天責愈深此五者王事之綱紀南面之急務唯陛下  
留神對奏天子異焉特召見永其夏皆令諸方正對策  
語在杜欽傳永對畢因曰臣前幸得條對災異之效禍  
亂所極言關於聖聰書陳於前陛下棄委不納而更使  
方正對策背可懼之大異問不急之常論廢承天之至

言角無用之虛文欲末殺災異滿譎誣天是故皇天勃然發怒甲巳之間暴風三溱拔樹折木此天至明不可欺之效也上特復問永永對曰日食地震皇后貴妾專寵所致是時上初即位謙讓委政元舅大將軍王鳳議者多歸咎焉永知鳳方見柄用陰欲自託乃復曰方今四夷賓服皆為臣妾北無薰粥冒頓之患南無趙佗呂嘉之難三垂晏然靡有兵革之警諸侯大者乃食數縣漢吏制其權柄不得有為亡吳楚燕梁之執百官盤互

親疎相錯骨肉大臣有申伯之忠洞洞屬屬小心畏忌  
無重合安陽博陸之亂三者無毛髮之辜不可歸咎諸  
舅此欲以政事過差丞相父子中尚書宦官檻塞大異  
皆瞽說欺天者也竊恐陛下舍昭昭之白過忽天地之  
明戒聽晦昧之瞽說歸咎乎無辜倚異乎政事重失天  
心不可之大者也陛下即位委任遵舊未有過政元年  
正月白氣較然起乎東方至其四月黃濁四塞覆冒京  
師申以大水著以震蝕各有占應相為表裏百官庶士

無所歸倚陛下獨不怪與白氣起東方賤人將興之表也黃濁冒京師王道微絕之應也夫賤人當起而京師道微二者已醜陛下誠深察愚臣之言致懼天地之異長思宗廟之計改往反過抗湛溺之意解偏駁之愛奮乾綱之威平天覆之施使列妾得人人更進猶尚未足也急復益納宜子婦人毋擇好醜毋避嘗字母論年齒推法言之陛下得繼嗣於微賤之間乃反為福得繼嗣而已母非有賤也後宮女史使令有直意者廣求於微

賤之間以遇天所開右慰釋皇太后之憂愠解謝上帝之譴怒則繼嗣蕃滋災異訖息陛下則不深察愚臣之言忽於天地之戒咎根不除水雨之災山石之異將發不久發則災異已極天變成形臣欲捐身關策不及事已疏賤之臣至敢直陳天意斥譏帷幄之私欲間離貴后盛妾自知忤心逆耳必不免於湯鑊之誅此天保右漢家使臣敢直言也三上封事然後得召待詔一旬然後得見夫由疏賤納至忠甚苦由至尊聞天意甚難語

不可露願具書所言因侍中奏陛下以示腹心大臣以  
為非天意臣當伏妄言之誅則以為誠天意也奈何忘  
國家大本背天意而從欲唯陛下省察熟念厚為宗廟  
計時對者數十人永與杜欽為上第焉上皆以其書示  
後宮後上嘗賜許皇后書采永言以責之語在外戚傳  
永既陰為大將軍鳳說矣能實最高由是擢為光祿大  
夫永奏書謝鳳曰永斗筭之材質薄學朽無一日之雅  
左右之介將軍說其狂言擢之皂衣之吏廁之爭臣之

末不聽浸潤之譖不食膚受之愬雖齊桓晉文用士篤  
密察父愆兄覆育子弟誠無以加昔豫子吞炭壞形以  
奉見異齊客隕首公門以報恩施知氏孟嘗猶有死士  
何況將軍之門鳳遂厚之數年出為安定太守時上諸  
舅皆修經書任政事平阿侯譚年次當繼大將軍鳳輔  
政尤與永善陽朔中鳳病困薦從弟御史大夫音以自  
代上從之以音為大司馬車騎將軍領尚書事而平阿  
侯譚位特進領城門兵永聞之與譚書勸令辭職闔門



高枕為智者首譚感永言遂辭讓不受領城門職由是  
譚音相與不平永遠為郡吏恐為音所危病滿三月免  
音奏請永補營軍司馬永數謝罪自陳得轉為長史音  
用從舅越親輔政威權損於鳳時永復說音曰將軍履  
上將之位食膏腴之都任周召之職擁天下之樞可謂  
富貴之極人臣無二天下之責四面至矣將何以居之  
宜夙夜孳孳執伊尹之彊德以守職匡上誅惡不避親  
愛舉善不避仇讐言以章至公立信四方篤行三者乃可

以長堪重任久享盛寵太白出西方六十日法當參天  
今已過期尚在桑榆之間質弱而行遲形小而光微熒  
惑角怒明大逆行守尾其逆常也守尾變也意豈將軍  
忘湛漸之義委曲從順所執不彊不廣用士尚有好惡  
之忌蕩蕩之德未純方與將相大臣乖離之萌也何故  
始襲司馬之號俄而金火並有此變上天至明不虛見  
異唯將軍畏之慎之深思其故改求其路以享天意音  
猶不平薦永為護苑使者音薨成都侯商代為大司馬

衛將軍永乃遷為涼州刺史奏事京師訖當之部時有黑龍見東萊上使尚書問永受所欲言永對曰臣竊見漢家行夏正夏正色黑黑龍同姓之象也龍陽德由小之大故為王者瑞應未知同姓有見本朝無繼嗣之慶多危殆之隙欲因擾亂舉兵而起者邪將動心冀為後者殘賊不仁若廣陵昌邑之類臣愚不能處也元年九月黑龍見其晦日有食之今年二月己未夜星隕乙酉日有食之六月之間大異四發二而同月三代之末春

秋之亂未嘗有也臣聞三代所以隕社稷喪宗廟者皆由婦人與羣惡沈湎於酒書曰乃用婦人之言自絕于天四方之逋逃多罪是宗是長是信是使詩云燎之方陽寧或滅之赫赫宗周褒姒威之易曰濡其首有孚失是秦所以二世十六年而亡者養生秦奢奉終秦厚也二者陛下兼而有之臣請略陳其效易曰在中饋無攸遂言婦人不得與政事也詩云懿厥哲婦為梟為鴟匪降自天生自婦人建始河平之際許班之貴傾動前朝

熏灼四方賞賜無量空虛內戚女寵至極不可上矣今  
之後起天所不饗什倍于前廢先帝法度聽用其言官  
秩不當縱釋王誅驕其親屬假之威權從橫亂政刺舉  
之吏莫敢奉憲又以掖庭獄大為亂阱榜箠瘠於炮烙  
絕滅人命主為趙李報德復怨反除白罪建治正吏多  
繫無辜掠立迫恐至為人起責分利受謝生入死出者  
不可勝數是以日食再既以昭其辜王者必先自絕然  
後天絕之陛下棄萬乘之至貴樂家人之賤事厭高美

之尊號好匹夫之卑字崇聚僇輕無義小人以為私客  
數離深宮之固挺身晨夜與羣小相隨烏集雜會飲醉  
吏民之家亂服共坐流酒媠媠溷彘無別閔免遁樂晝  
夜在路典門戶奉宿衛之臣執干戈而守空宮公卿百  
僚不知陛下所在積數年矣王者以民為基民以財為  
本財竭則下畔下畔則上亡是以明王愛養基本不敢  
窮極使民如承大祭今陛下輕奪民財不愛民力聽邪  
臣之計去高敞初陵捐十年功緒改作昌陵反天地之

性因下為高積土為山發徒起邑並治宮館大興繇役  
重增賦斂徵發如雨役百乾谿費擬驪山靡敝天下五  
年不成而後反故又廣盱營表發人家墓斷截骸骨暴  
揚尸柩百姓財竭力盡愁恨感天災異婁降饑饉仍臻  
流散冗食餓死於道以萬數公家無一年之畜百姓無  
旬日之儲上下俱匱無以相救詩云殷監不遠在夏后  
之世願陛下追觀夏商周所以失之以鏡考已行有不  
合者臣當伏妄言之誅漢興九世百九十餘載繼體之

主七皆承天順道遵先祖法度或以中興或以治安至於陛下獨違道縱欲輕身妄行當盛壯之隆無繼嗣之福有危亡之憂積失君道不合天意亦已多矣為人後嗣守人功業如此豈不負哉方今社稷宗廟禍福安危之機在於陛下陛下誠肯發明聖王之德昭然遠寤畏此上天之威怒深懼危亡之徵兆蕩滌邪辟之惡志厲精致政專心反道絕羣小之私客免不正之詔除悉罷北宮私奴車馬媵出之具克已復禮毋貳微行出飲之



過以防迫切之禍深惟日食再既之意抑損椒房玉堂之盛寵母聽後宮之請謁除掖庭之亂獄去炮烙之陷阱誅戮佞邪之臣及左右執左道以事上者以塞天下之望且寢初陵之作止諸繕治宮室闕更減賦盡休力役存卹振捄困乏之人以弭遠方宗厲忠直放退殘賊無使素餐之吏久尸厚祿以次貫行固執無違夙夜孳孳婁省無怠舊愆畢改新德既章纖介之邪不復載心則赫赫大異庶幾可銷天命去就庶幾可復社稷宗廟

庶幾可保矣成帝性寬而好文辭又久無繼嗣數為微行多近幸小臣趙李從微賤專寵皆皇太后與諸舅夙夜所常憂至親難數言故推永等使因天變而切諫勸上納用之永自知有內應展意無所依違每言事輒見答禮至上此對上大怒衛將軍商密摘永令發去上使侍御史收永勅過交道廐者勿追御史不及永還上意亦解自悔明年徵永為太中大夫遷光祿大夫給事中元延元年為北地太守時災異尤數永當之官上使衛

尉淳于長受永所欲言永對曰臣聞王者躬行道德承  
順天地博愛仁恕恩及行葦籍稅取民不過常法宮室  
車服不踰制度事節財足黎庶和睦則卦氣理效五徵  
時序百姓壽考庶草蕃滋符瑞並降以昭保右失道妄  
行逆天暴物窮奢極欲湛涵荒淫婦言是從誅逐仁賢  
離遯骨肉羣小用事峻刑重賦百姓愁怨則卦氣悖亂  
咎徵著郵上天震怒災異屢降日月薄食五星失行山  
崩川潰水泉踴出妖孽並見彗星耀光饑饉荐臻百姓

短折萬物夭傷終不改寤惡洽變備不復譴告更命有德詩云乃眷西顧此惟予宅夫去惡奪弱遷命賢聖天地之常經百王之所同也加以功德有厚薄期質有修短時世有中季天道有盛衰陛下承八世之功業當陽數之標季涉三七之節紀遭無妄之卦運直百六之災阨三難異科雜焉同會建始元年以來二十載間羣災大異交錯鋒起多於春秋所書八世著記久不塞除重以今年正月己亥朔日有食之三朝之會四月丁酉四

方衆星白晝流隕七月辛未彗星橫天乘三難之際會

畜衆多之災異因之以饑饉接之以不贍彗星極異也

土精所生流隕之應出於饑變之後兵亂作矣厥期不

久隆德積善懼不克濟內則為深宮後庭將有驕臣悍

妾醉酒狂悖卒起之敗北宮苑囿街巷之中臣妾之家

幽間之處徵舒崔杼之亂外則為諸夏下土將有樊並

蘇令陳勝項梁奮臂之禍內亂朝暮日戒諸夏舉兵以

火角為期安危之分界宗廟之至憂臣永所以破膽寒

心豫言之累年下有其萌然後變見於上可不致慎禍起細微姦生所易願陛下正君臣之義無復與羣小媾黷燕飲中黃門後庭素驕慢不謹嘗以醉酒失臣禮者悉出勿留勤三綱之嚴修後宮之政抑遠驕妬之寵崇近婉順之行加惠失志之人懷柔怨恨之心保至尊之重秉帝王之威朝覲法出而後駕陳兵清道而後行無復輕身獨出飲食臣妾之家三者既除內亂之路塞矣諸夏舉兵萌在民饑饉而吏不卹興於百姓困而賦歛

重發於下怨離而上不知易曰屯其膏小貞吉大貞凶  
傳曰饑而不損茲謂泰厥災水厥咎亡詆辭曰關動牡  
飛辟為無道臣為非厥咎亂臣謀篡王者遭衰難之世  
有饑饉之災不損用而大自潤故凶百姓困貧無以共  
求愁悲怨恨故水城關守國之固固將去焉故牡飛往  
年郡國二十一傷於水災禾黍不入今年蠶麥咸惡百  
川沸騰江河溢決大水泛濫郡國十五有餘比年喪稼  
時過無宿麥百姓失業流散羣輩守關大異較炳如彼

水災浩浩黎庶窮困如此宜損常稅小自潤之時而有  
司奏請加賦甚繆經義逆於民心布怨趨禍之道也牡  
飛之狀殆為此發古者穀不登虧膳災婁至損服凶年  
不墜塗明王之制也詩云凡民有喪扶服捄之論語曰  
百姓不足君孰與足臣願陛下勿許加賦之奏益減太  
官導官中御府均官掌畜廩犧用度止上方織室京師  
郡國工服官發輸造作以助大司農流恩廣施振贍困  
乏開關梁內流民恣所欲之以救其急立春遣使者循



行風俗宣布聖德存卹孤寡問民所苦勞二千石勅勸  
耕桑毋奪農時以慰綏元元之心防塞大姦之隙諸夏  
之亂庶幾可息矣永對奏天子甚感其言永於經書汎  
為疏達與杜欽杜鄴略等不能洽浹如劉向父子及揚  
雄其於天官京氏易最密故善言災異前後所上四十  
餘事略相反覆專攻上身與後宮而已黨於王氏上亦  
知之不甚親信永所居任職為北地太守歲餘衛將軍  
商薨曲陽侯根為驃騎將軍薦永徵入為大司農歲餘

永病二月有司奏請免故事公卿病輒賜告至永獨即時免數月卒於家本名並以尉氏樊並反更名永云

杜鄴字子夏本魏郡繁陽人也祖父及父積功勞皆至郡守武帝時徙於茂陵鄴少孤其母張敞女鄴壯從敞子吉學問得其家書以孝廉為郎與車騎將軍王音善平阿侯譚不受城門職後薨上閔悔之乃復令譚弟成都侯商位特進領城門兵得舉吏如將軍府鄴見音前與平阿有隙即說音與商親密音從其言由是二人皆

重鄴後以病去郎及商為大司馬衛將軍除鄴主簿以  
為腹心舉侍御史哀帝即位遷為涼州刺史鄴居職寬  
舒少威嚴數年以病免是時帝祖母定陶傅太后稱太  
皇太后帝母丁姬稱帝太后而皇后即傅太后從弟子  
也傅氏侯者三人丁氏侯者二人又封傅太后同母弟  
子鄭業為陽信侯傅太后尤與政專權元壽元年正月  
朔上以后父孔鄉侯傅晏為大司馬衛將軍而帝舅陽  
安侯丁明為大司馬驃騎將軍臨拜日食詔舉方正直

言扶陽侯韋育舉鄴方正鄴對曰臣聞陽尊陰卑卑者  
隨尊尊者兼卑天之道也是以男雖賤各為其家陽女  
雖貴猶為其國陰故禮明三從之義雖有文德之母必  
繫於子春秋不書紀侯之母陰義殺也昔鄭伯隨姜氏  
之欲終有叔段篡國之禍周襄王內迫惠后之難而遭  
居鄭之危漢興呂太后權私親屬又以外孫為孝惠后  
是時繼嗣不明凡事多晦晝昏冬雷之變不可勝載竊  
見陛下行不偏之政每事儉約非禮不動誠欲正身與

天下更始也然嘉瑞未應而日食地震民訛言行籌傳  
相驚恐案春秋災異以指象為言語故在於得一類而  
達之也日食明陽為陰所臨坤卦乘離明夷之象也坤  
以法地為土為母以安靜為德震不陰之效也占象甚  
明臣敢不直言其事昔曾子問從令之義孔子曰是何  
言歟善閔子騫守禮不苟從親所行無非禮者故無可  
間也前大司馬新都侯莽退伏第家以詔策決復遣就  
國高昌侯宏去蕃自絕猶受封土制書侍中駙馬都尉

遷不忠巧佞免歸故郡間未旬月則有詔還大臣奏正  
其罰卒不得遣而反兼官奉使顯寵過故及陽信侯業  
皆緣私君國非功義所止諸外家昆弟無賢不肖並侍  
帷幄布在列位或典兵衛或將軍屯寵意并於一家積  
貴之執世所希見所希聞也至乃並置大司馬將軍之  
官皇甫雖盛三桓雖隆魯為作三軍無以甚此當拜之  
日晦然日蝕不在前後臨事而發者明陛下謙遜無專  
承指非一所言輒聽所欲輒隨有罪惡者不坐辜罰無

功能者畢受官爵流漸積猥正尤在是欲令昭昭以覺  
聖朝昔詩人所刺春秋所譏指象如此殆不在他由後  
視前忿邑非之逮身所行不自鏡見則以為可計之過  
者疏賤獨偏見疑內亦有此類天變不空保右世主如  
此之至奈何不應臣聞野雞著怪高宗深動大風暴過  
成王怛然願陛下加致精誠事稽諸古以收帝怒以厭  
下心禎祥福祿何嫌不報鄴未拜病卒鄴言民訛言行  
籌及谷永言王者買私田彗星隕石牡飛之事皆為時

所稱初鄴從張吉學吉子竦又孤幼從鄴學問亦著於

世尤長小學

小學文字之學也周禮八歲入小學保氏教國子以六書故因名云鄴子林

清靜好古亦有雅材建武中歷位列卿至大司空其正  
文字過於鄴竦故世言小學者由杜公

何武字君公蜀郡郫縣人也宣帝時天下和平四夷賓  
服神爵五鳳之間婁蒙瑞應而益州刺史王襄使辯士  
王褒頌漢德作中和樂職宣布詩三篇武年十四五與  
成都楊覆衆等共習歌之是時宣帝循武帝故事求通



達茂異士召見武等於宣室上曰此盛德之事吾何足以當之哉以褒為待詔武等賜帛罷武詣博士受業治易以射策甲科為郎與翟方進交志相友光祿勳舉四行遷為鄠令坐法免歸武兄弟五人皆為郡吏郡縣敬憚之武弟顯家有市籍租常不入縣數負其課市嗇夫求商捕辱顯家顯怒欲以吏事中商武曰以吾家租賦繇役不為衆先奉公吏不亦宜乎武卒白太守召商為卒吏州里聞之皆服焉久之太僕王音舉武賢良方正

徵對策拜為諫大夫遷揚州刺史所舉奏二千石長史必先露章服罪者為虧除免之而已不服極法奏之抵罪或至死九江太守戴聖禮經號小戴者也行治多不法前刺史以其大儒優容之及武為刺史行部錄囚徒有所舉以屬郡聖曰後進生何知迺欲亂人治皆無所決武使從事廉得其罪聖懼自免後為博士毀武於朝廷武聞之終不揚其惡而聖子賓客為羣盜得為盜吏捕得之繫廬江聖自以子必死武平心決之卒得不死自是後

聖慙服武每奏事至京師聖未嘗不造門謝恩武為刺  
史二十石有罪應時舉奏其餘賢不肖敬之如一是以  
郡國各重其守相州中清平行郡必先即學宮見諸生  
試其誦論問以得失然後入傳舍出記問墾田頃畝五  
穀美惡已乃見二十石以為常初武為郡吏時事太守  
何壽壽知武有宰相器以其同姓故厚之後壽為大司  
農其兄子為廬江長史時武奏事在邸壽兄子適在長  
安壽為具召武弟顯及故人楊覆衆等酒酣見其兄子

曰此子揚州長史材能駑下未嘗省見顯等甚慙退以  
謂武曰刺史古之方伯上所委任一州表率也職在進  
善退惡吏治行有茂異民有隱逸廼當召見不可有所  
私問顯覆衆彊之不得已召見賜卮酒歲中廬江太守  
舉之其守法見憚如此為刺史五歲入為丞相司直丞  
相薛宣敬重之出為清河太守數歲坐郡中被災害什  
四以上免久之大司馬曲陽侯王根薦武徵為諫大夫  
遷兗州刺史入為司隸校尉徙京兆尹二歲坐舉方正

所舉者召見槃辟雅拜有司以為詭衆虛偽武坐左遷  
楚內史遷沛郡太守復入為廷尉綏和元年御史大夫  
孔光左遷廷尉武為御史大夫成帝欲修辟雍通三公  
官即改御史大夫為大司空武更為大司空封汜鄉侯  
食邑千戶汜鄉在琅邪不其哀帝初即位褒賞大臣更  
以南陽犍之博望鄉為汜鄉侯國增邑千戶武為人仁  
厚好進士獎稱人之善為楚內史厚兩龔在沛郡厚兩  
唐及為公卿薦之朝廷此人顯於世者何侯力也世以

此多焉然疾朋黨問文吏必於儒者問儒者必於文吏以相參檢欲除吏先為科例以防請託其所居亦無赫赫名去後常見思及為御史大夫司空與丞相方進共奏言往者諸侯王斷獄治政內史典獄事相總綱紀輔王中尉備盜賊今王不斷獄與政中尉官罷職并內史郡國守相委任所以壹統信安百姓也今內史位卑而權重威職相踰不統尊者難以為治臣請相如太守內史如都尉以順尊卑之序平輕重之權制曰可以內史

為中尉初武為九卿時奏言宜置三公官又與方進共  
奏罷刺史更置州牧後皆復復故語在朱博傳唯內史  
事施行多所舉奏號為煩碎不稱賢公功名略比薛宣  
其材不及也而經術正直過之武後母在郡遣吏歸迎  
會成帝崩吏恐道路有盜賊後母留止左右或譏武事  
親不篤哀帝亦欲改易大臣遂以此策免武令上大司  
空印綬罷歸就國後五歲諫大夫鮑宣數稱寃之天子  
感丞相王嘉之對而高安侯董賢亦薦武由是復徵為

御史大夫月餘徙為前將軍先是新都侯王莽就國數  
年上以太皇太后故徵莽還京師莽從弟成都侯王邑  
為侍中矯稱太皇太后指白哀帝為莽求特進給事中  
哀帝復請之事發覺太后為謝上以太后故不忍誅之  
左遷邑為西河屬國都尉削千戶後有詔舉太常莽私  
從武求舉武不敢舉後數月哀帝崩太后即日引莽入  
收大司馬董賢印綬詔有司舉可大司馬者莽故大司  
馬辭位辟丁傅衆庶稱以為賢又太后近親自大司徒



孔光以下舉朝皆舉莽武為前將軍素與左將軍公孫祿相善二人獨謀以為往時孝惠孝昭少主之世外戚呂霍上官持權幾危社稷今孝成孝哀比世無嗣方當選立親近輔幼主不宜令異姓大臣持權親疏相錯為國計便於是武舉公孫祿可大司馬而祿亦舉武太后竟自用莽為大司馬莽風有司劾奏武公孫祿互相稱舉皆免武就國後莽寢盛為宰衡陰誅不附己者元始三年呂寬等事起時大司空甄豐承莽風指遣使者乘

傳案治黨與連引諸所欲誅者上黨鮑宣南陽彭偉杜  
公子郡國豪傑坐死者數百人武在見誣中大理正檻  
車徵武武自殺人多寃之莽欲厭衆意令武子况嗣為  
侯諡武曰刺侯莽篡位免况為庶人

王嘉字公仲平陵人也以明經射策甲科為郎坐戶殿  
門失闌免光祿勳于永除為掾察廉為南陵丞復察廉  
為長陵尉鴻嘉中舉敦朴能直言者召見宣室對政事  
得失超遷太中大夫出為九江河南太守治甚有聲徵

入為大鴻臚徙京兆尹遷御史大夫建平三年代平當  
為丞相封新甫侯加食邑千一百戶嘉為人剛直嚴毅  
有威重上甚敬之哀帝初立多變更成帝之政嘉上疏  
以為聖王之功在於得人因薦儒者公孫光滿昌及能  
吏蕭咸薛脩等皆故二千石有名稱者天子納而用之  
會息夫躬孫寵等因中常侍宋弘上書告東平王雲祝  
詛又與后舅伍宏謀弒上為逆雲等伏誅躬寵擢為二  
千石是時侍中董賢愛幸於上上欲侯之而未有所緣

傅嘉勸上因東平事以封賢上於是定躬寵告東平本章掇去宋弘更言由董賢以聞欲以其功侯之皆先賜爵關內侯頃之欲封賢等上心憚嘉乃先使皇后父孔鄉侯傅晏持詔書視丞相御史於是嘉與御史大夫賈延上封事言竊見董賢等三人始賜爵衆庶口口咸曰賢貴其餘并蒙恩至今流言未解陛下仁恩於賢等不已宜暴賢等本奏語言延問公卿大夫博士議郎考合古今明正其義然後乃加爵土不然恐大失衆心海內

引領而議暴下其事必有言當封者在陛下所從天下雖不說咎有所分不獨在陛下前定陵侯淳于長初封其事亦議大司農谷永以長當封衆人歸咎於永先帝不獨蒙其譏臣嘉臣延材駑不稱死有餘責知順指不逆可得容身須臾所以不敢者思報厚恩也上感其言止數月遂下詔切責公卿封賢為高安侯南陽太守寵為方陽侯左曹光祿大夫躬為宜陵侯後數月日食舉直言嘉復奏封事曰臣聞咎繇戒帝舜曰亡傲逸欲有

國兢兢業業一日二日萬幾箕子戒武王曰臣無有作威作福亡有玉食臣之有作福作威玉食害于而家凶于而國人用側頗僻民用僭慝言如此則逆尊卑之序亂陰陽之統而害及王者其國極危國人傾仄不正民用僭差不壹此君不由法度上下失序之敗也武王躬履此道隆至成康自是以後縱心恣欲法度陵遲至於臣弑君子弑父父子至親失禮患生何況異姓之臣孔子曰道千乘之國敬事而信節用而愛人使民以時孝

文皇帝備行此道海內蒙恩為漢太宗孝宣皇帝賞罰  
信明施與有節記人之功忽於小過以致治平孝元皇  
帝奉承大業溫恭少欲都內錢四十萬萬水衡錢二十  
五萬萬少府錢十八萬萬嘗幸上林後宮馮貴人從臨  
獸圈猛獸驚出貴人前當之元帝嘉美其義賜錢五萬  
掖庭見親有加賞賜屬其人勿衆謝示平惡偏重失人  
心賞賜節約是時外戚貲十萬者少耳故少府水衡見  
錢多也雖遭初元永光凶年饑饉加有西羌之憂外奉

師旅內振貧民終無傾危之憂以府藏內充實也孝成  
皇帝時諫臣多言燕出之害及女寵專愛耽於酒色損  
德傷年其言甚切然終不怨怒也寵臣淳于長張放史  
育育數貶退家貲不滿千萬放斥逐就國長榜死於獄  
不以私愛害公義故雖多內譏朝廷安平傳業陛下陛  
下在國之時好詩書上節儉徵來所過道上稱誦德美  
此天下所以回心也初即位易帷帳去錦繡乘輿席緣  
綈繒而已共皇寢廟比比當作憂閔元元唯用度不足



以義割恩輒且止息今始作治而駙馬都尉董賢亦起  
官寺上林中又為賢起大第開門鄉北闕引王渠灌園  
池使者護作賞賜吏卒甚於治宗廟賢母病長安厨給  
祠具道中過者皆飲食為賢治器器成奏御迺行或物  
好特賜其工自貢獻宗廟三宮猶不至此賢家有賓婚  
及見親諸官並共賜及倉頭奴婢人十萬錢使者護視  
發取市物百賈震動道路諠譁羣臣惶惑詔書罷苑而  
以賜賢二千餘頃均田之制從此墮壞奢僭放縱變亂

陰陽災異衆多百姓訛言持籌相驚被髮徒跣而走乘馬者馳天惑其意不能自止或以為籌者策失之戒也陛下素仁智慎事今而有此大譏孔子曰危而不持顛而不扶則將焉用彼相矣臣嘉幸得備位竊內悲傷不能通愚忠之信身死有益於國不敢自惜唯陛下慎已之所獨鄉察衆人之所共疑往者寵臣鄧通韓嫣驕貴失度逸豫無厭小人不勝情慾卒陷罪辜亂國亡軀不終其祿所謂愛之適足以害之也宜深覽前世以節賢

寵全安其命於是上寢不悅而愈愛賢不能自勝會祖母傅太后薨上因託傅太后遺詔令成帝母王太后下丞相御史益封賢二千戶及賜孔鄉侯汝昌侯陽新侯國嘉封還詔書因奏封事諫上及太后言王者代天爵人不可不慎比者山崩地動日食於三朝皆陰盛侵陽之戒前賢已再封晏商再易邑業緣私橫求恩已過厚求索自恣不知厭足甚傷尊尊之義不可以示天下臣謹封上詔書不敢露見非愛死而不自法恐天下聞之

故不敢自劾愚戇數犯忌諱唯陛下省察初廷尉梁相與丞相長史御史中丞及五二十石雜治東平王雲獄時冬月未盡二旬而相心疑雲寃獄有飾辭奏欲傳之長安更下公卿覆治尚書令鞫譚僕射宗伯鳳以為可許天子以相等皆見上體不平外內顧望操持兩心幸雲踰冬無討賊疾惡主讐之意制詔免相等皆為庶人後數月大赦嘉奏封事薦相等明習治獄相計謀深沉譚頗知文雅鳳經明行修聖主有計功除過臣竊為朝

廷惜此三人書奏上不能平後二十餘日嘉封還益董  
賢戶事上乃發怒召嘉詣尚書責問以相等前坐在位  
不盡忠誠外附諸侯操持兩心背人臣之義今所稱相  
等材美足以相計除罪君以道德位在三公以總方略  
一統萬類分明善惡為職知相等罪惡陳列著聞天下  
時輒以自劾今又稱譽相等云為朝廷惜之大臣舉錯  
恣心自在迷國罔上近由君始將謂遠者何對狀嘉免  
冠謝罪事下將軍中朝者光祿大夫孔光左將軍公孫

祿右將軍王安光祿勳馬宮光祿大夫龔勝劾嘉迷國罔上不道請與廷尉雜治勝獨以為嘉備宰相諸事並廢咎由嘉生嘉坐薦相等微薄以應迷國罔上不道恐不可以示天下遂可光等奏光等請謁者召嘉詣廷尉詔獄制曰驃騎將軍御史大夫中二千石諸大夫博士議郎雜議衛尉雲等十五人以為如光等言可許議郎龔等以為嘉言事前後相違無所執守不任宰相之職宜奪爵土免為庶人永信少府猛等十人以為聖王斷

獄必先原心定罪探意立情故死者不抱恨而入地生

者不銜怨而受罪明主躬聖德重大臣刑辟廣延有司

議欲使海內咸服嘉罪名雖應法聖王之於大臣在輿

為下御坐則起疾病視之無數死則臨弔之廢宗廟之

祭進之以禮退之以義誅之以行案嘉本以相等為罪

罪惡雖著大臣括髮關械裸躬就笞非所以重國褒宗

廟也今春月寒氣錯繆霜露數降宜示天下以寬和臣

等不知大義唯陛下察焉有詔假謁者節召丞相詣廷

尉詔獄使者既到府掾史涕泣共和藥進嘉嘉不肯服  
主簿曰將相對不理陳寃相踵以為故事君侯宜引決  
使者危坐府門上主簿復前進藥嘉引藥杯以擊地謂  
官屬曰丞相幸得備位三公奉職負國當伏刑都市以  
示萬衆丞相豈兒女子邪何謂咀藥而死嘉遂裝出見  
使者再拜受詔乘吏小車去蓋不冠隨使者詣廷尉廷  
尉收嘉丞相新甫侯印綬縛嘉載致都船詔獄上聞嘉  
生自詣吏大怒使將軍以下與五二千石雜治吏詰問



嘉嘉對曰案事者思得實竊見相等前治東平王獄不以雲為不當死欲關公卿示重慎置驛馬傳囚勢不得踰冬月誠不見其外內顧望阿附為雲驗復幸得蒙大赦相等皆良善吏臣竊為國惜賢不私此三人獄吏曰苟如此則君何以為罪猶當有以負國不空入獄矣吏稍侵辱嘉嘉喟然仰天嘆曰幸得充備宰相不能進賢退不肖以是負國死有餘責吏問賢不肖主名嘉曰賢故丞相孔光故大司空何武不能進惡高安侯董賢父

子佞邪亂朝而不能退罪當死死無所恨嘉繫獄二十餘日不食嘔血而死帝舅大司馬驃騎將軍丁明素重嘉而憐之上遂免明以董賢代之語在賢傳嘉為相二年誅國除死後上覽其對而思嘉言復以孔光代嘉為丞相徵用何武為御史大夫元始四年詔書追錄忠臣封嘉子崇為新甫侯追諡嘉為忠侯

師丹字仲公琅邪東武人也治詩事匡衡舉孝廉為郎元帝末為博士免建始中州舉茂才復補博士出為東

平王太傅丞相翟方進御史大夫孔光舉丹議論深博  
廉正守道徵入為光祿大夫丞相司直數月復以光祿  
大夫給事中由是為少府光祿勳侍中甚見尊重成帝  
末年立定陶王為皇太子以丹為太子太傅哀帝即位  
為左將軍賜爵關內侯食邑領尚書事遂代王莽為大  
司馬封高樂侯月餘徙為大司空上少在國見成帝委  
政外家王氏僭盛常內邑邑及即位多欲有所匡正封  
拜丁傅奪王氏權丹自以師傅居三公位得信於上上

書言古者諒闇不言聽於冢宰三年無改於父之道前  
大行尸柩在堂而官爵臣等以及親屬赫然皆貴寵封  
舅為陽安侯皇后尊號未定豫封父為孔鄉侯出侍中  
王邑射聲校尉王邯等詔書比下變動政事卒暴無漸  
臣縱不能明陳大義復曾不能牢讓爵位相隨空受封  
侯增益陛下之過閒者郡國多動地水出流殺人民日  
月不明五星失行此皆舉錯失中號令不定法度失理  
陰陽溷濁之應也臣伏惟人情無子年雖六七十猶博

取而廣求孝成皇帝深見天命燭知至德以壯年克已立陛下為嗣先帝暴棄天下而陛下繼體四海安寧百姓不懼此先帝聖德當合天人之功也臣聞天威不遠顏咫尺願陛下深思先帝所以建立陛下之意且克已躬行以觀羣下之從化天下者陛下之家也肺腑何患不富貴不宜倉卒先帝不量臣愚以為太傅陛下以臣託師傅故亡功德而備鼎足封大國加賜黃金位為三公職在左右不能盡忠補過而令庶人竊議災異數見

此臣之大罪也臣不敢言乞骸骨歸於海濱恐嫌於偽誠慙負重責義不得不盡死書數十上多切直之言初哀帝即位成帝母稱太皇太后成帝趙皇后稱皇太后而上祖母傅太后與母丁后皆在國邸自以定陶共王為稱高昌侯董宏上書言秦莊襄王母本夏氏而為華陽夫人所子及即位後俱稱太后宜立定陶共王后為皇太后事下有司時丹以左將軍與王莽共劾奏宏知皇太后至尊之號天下一統而稱引亡秦以為比喻註

誤聖朝非所宜言大不道上新立謙讓納用莽丹言免  
宏為庶人傅太后大怒要上必欲稱尊號上於是追尊  
定陶共王為共皇帝尊傅太后為共皇太后丁后為共  
皇后郎中令冷褒黃門郎段熲等復奏言定陶共皇太  
后共皇后皆不宜復引定陶蕃國之名以冠大號車馬  
衣服宜皆稱皇之意置吏二千石以下各共厥職又宜  
為共皇立廟京師上復下其議有司皆以為宜如褒猶  
言丹議獨曰聖王制禮取法於天地故尊卑之禮明則

人倫之序正人倫之序正則乾坤得其位而陰陽順其節人主與萬民俱蒙福祐尊卑者天地定位不可亂也今定陶共皇太后共皇后以定陶共為號者母從子妻從夫之義也欲立官置吏車服與太皇太后並非所以明尊卑無二上之義也定陶共皇號諡已前定義不得復改禮父為士子為天子祭以天子其尸服以士服子亡爵父之義尊父母也為人後者為之子故為所後服斬衰三年而降其父母朞明尊本祖而重正統也孝成



皇帝聖恩深遠故為共王立後奉承祭祀令共皇長為  
一國太祖萬世不毀恩義已備陛下既繼體先帝持重  
大宗承宗廟天地社稷之祀義不得復奉定陶共皇祭  
入其廟今欲立廟於京師而使臣下祭之是無主也又  
親盡當毀空去一國太祖不墮之祀而就無主當毀不  
正之禮非所以尊厚共皇也丹由是浸不合上意會有  
上書言古者以龜貝為貨今以錢易之民以故貧宜可  
改幣上以問丹丹對言可改章下有司議皆以為行錢

以來久矣難卒變易丹老人忘其前語後從公卿議又  
丹使吏書奏吏私寫其草丁傅子弟聞之使人上書告  
丹上封事行道人徧持其書上以問將軍中朝臣皆對  
曰忠臣不顯諫大臣奏事不宜漏泄令吏民傳寫流聞  
四方臣不密則失身宜下廷尉事下廷尉廷尉劾丹大  
不敬事未決給事中博士申咸快欽上書言丹經行無  
比自近世大臣能若丹者少發憤懣奏封事不及深思  
遠慮使主簿書漏泄之過不在丹以此貶黜恐不厭衆

心尚書劾咸欽幸得以儒官選擢備腹心上所折中定  
疑知丹社稷重臣議罪處罰國之所慎咸欽初傳經義  
以為當治事以暴列乃復上書妄稱譽丹前後相違不  
敬上貶咸欽秩各二等遂策免丹令上大司空高樂侯  
印綬罷歸後尚書令唐林上疏為丹訟寃上從林言復  
賜丹爵關內侯食邑三百戶丹既免數月上用朱博議  
尊傅太后為皇太太后丁后為帝太后與太皇太后及  
皇太后同尊又為共皇立廟京師儀如孝元皇帝博遷

為丞相復與御史大夫趙元以前事奏免丹為庶人丹  
於是廢歸鄉里者數年平帝即位新都侯王莽白太皇  
太后發掘傅太后丁太后冢奪其璽綬更以民禮葬之  
定陶隳廢共皇廟諸造議冷褒段熲等皆徙合浦復免  
高昌侯宏為庶人徵丹詣公車賜爵關內侯食故邑數  
月太皇太后詔封丹為義陽侯月餘薨諡曰節侯子業  
嗣王莽敗乃絕

揚雄字子雲蜀郡成都人也其先出自有周伯僑者以

支庶食采於晉之揚因氏焉不知伯僑周何別也揚在河汾之間周衰而揚氏或稱侯號曰揚侯會晉六卿爭權韓趙魏興而范中行知伯斃當是時偪揚侯揚侯逃于楚巫山因家焉楚漢之興也揚氏遡江上處巴江州而揚季官至廬江太守漢元鼎間避仇復遡江上處嶠山之陽曰郢有田一壥有宅一區世世以農桑為業自季至雄五世而傳一子故雄無他揚於蜀雄少而好學不為章句訓詁通而已博覽無所不見為人簡易佚蕩

口吃不能劇譚默而好深湛之思清靜無為少嗜欲不汲汲於富貴不戚戚於貧賤不修廉隅以徼名當世家產不過十金乏無儋石之儲晏如也自有大度非聖哲之書不好也非其意雖富貴不事也顧嘗好辭賦先是時蜀有司馬相如作賦甚弘麗溫雅雄心壯之每作賦常擬之以為式又怪屈原文過相如至不容作離騷自投江而死悲其文讀之未嘗不流涕也以為君子得時則大行不得時則龍蛇遇不遇命也何必湛身哉乃作

書往往摭離騷文而反之自崦山投諸江流以弔屈原  
名曰反離騷又旁離騷作重一篇名曰廣騷又旁惜誦  
以下至懷沙一卷名曰畔牢愁

畔離也牢聊也與君相離愁而無聊也

文

多皆不載孝成帝時客有薦雄文似相如者上方郊祠  
甘泉泰畤汾陰后土以求繼嗣召雄待詔承明之庭正  
月從上幸甘泉還奏甘泉賦以風其辭曰惟漢十世將  
郊上元定泰畤雍神休尊明號同符三皇錄功五帝卹  
胤錫羨拓迹開統於是廼命羣僚歷吉日協靈辰星陳

而天行詔招搖與泰陰兮伏鈎陳使當兵屬堪輿以壁  
壘兮梢夔魑而扶獠狂八神奔而警蹕兮振殷麟而軍  
裝蚩尤之倫帶干將而秉玉戚兮飛蒙茸而走陸梁齊  
總總搏搏其相膠葛兮焮駭雲訊奮以方攘駢羅列布  
鱗以雜沓兮柴虎參差魚頡而鳥旰翕赫召霍霧集蒙  
合兮半散照爛粲以成章於是乘輿迺登夫鳳凰兮翳  
華芝駟蒼螭兮六素蚪蠖略蕤綏瀕虓慘纒帥爾陰閉  
雲然陽開騰清霄而軼浮景兮夫何旛旒邳偁之旖旎



也流星旄以電燭兮咸翠蓋而鸞旗  
敦萬騎於中營兮方玉車之十乘  
聲駢隱以陸離兮輕先疾雷以馭  
遺風陵高行之崿嶮兮超紆譎之  
清澄登椽欒而班天門兮馳閭闔  
而入凌兢是時未轅夫甘泉也迺  
望通天之繹繹下陰潛以慘廩兮  
上洪紛而相錯直嶢嶢以造天兮  
厥高慶而不可虜疆度平原唐其  
壇曼兮列新雉於林薄攢并閭與  
茇苦兮紛被麗其亡鄂崇丘陵之  
駮駮兮深溝竅巖而為谷達達離  
宮般以相燭兮封巒石關施

靡虐延屬於是大夏雲譎波詭推唯而成觀仰橋首以  
高視兮目冥眴而亡見正瀏濫以弘愴兮指東西之漫  
漫徒回回以徨徨兮魂固渺渺而昏亂據軫軒而周流  
兮忽軼軋而亡垠翠玉樹之青葱兮壁馬犀之璘璠金  
人乞乞其承鐘虛兮嵌巖巖其龍鱗揚光曜之燎燭兮  
乘景炎之炘炘配帝居之縣圃兮象泰壹之威神洪臺  
掘其獨出兮擻北極之尊尊列宿乃施於上榮兮日月  
纔經於枳振雷鬱律而巖突兮電倏忽於牆藩鬼魅不

能自逮兮半長途而下顛歷倒景而絕飛梁兮浮葭蠓  
而撒天左攬搶而右元冥兮前燦闕而後應門陰西海  
與幽都兮涌醴汨以生川蛟龍連蜷於東厓兮白虎敦  
圉虜昆侖覽膠流於高光兮溶方皇於西清前殿崔巍  
兮和氏瓏玲炕浮柱之飛榱兮神莫莫而扶傾闕闕  
其寥廓兮似紫宮之崢嶸駢交錯而曼衍兮崦嶵隗虜  
其相嬰乘雲閣而上下兮紛蒙籠以捁成曳紅采之流  
離兮颺翠氣之宛延襲璇室與傾宮兮若登高眇遠肅

虜臨淵回焱肆其碣駭兮猓桂椒而鬱移楊香芬第以  
穹隆兮擊薄櫨而將榮薌咤肸以搯根兮聲駢隱而歷  
鐘排玉戶而颺金鋪兮發蘭蕙與芎翦惟弮環其拂汨  
兮稍暗暗而靚深陰陽清濁穆羽相和兮若夔牙之調  
琴般倅弃其剗劂兮王爾投其鈎繩雖方征僑與偃佺  
兮猶仿佛其若夢於是事變物化目駭耳回蓋天子穆  
然珍臺間館璇題玉英蝸蝻蠖濩之中惟夫所以澄心  
清魂儲精垂思感動天地逆釐三神者迺搜述索耦臯

伊之徒冠倫魁能函甘棠之惠挾東征之意相與齊乎  
陽靈之宮靡薜荔而為席兮折瓊枝以為芳喻清雲之  
流霞兮飲若木之露英集虜禮神之囿登乎頌祇之堂  
建光耀之長旂兮昭華覆之威威攀璇璣而下視兮行  
遊目虜三危陳衆車於東阬兮肆玉軼而下馳漂龍淵  
而還九垓兮窺地底而上回風從從而扶轄兮鸞鳳紛  
其銜蕤梁弱水之滌滌兮躡不周之透蛇想西王母欣  
然而上壽兮屏玉女而卻虛妃玉女無所眺其清矚兮

慮妃曾不得施其蛾眉方擘道德之精剛兮侔神明與  
之為資於是欽崇宗祈燎熏皇天招搖泰壹舉洪頤樹  
靈旗樵蒸焜上配藜四施東燭滄海西耀流沙北燼幽  
都南煬丹厓元瓚觥膠秬鬯泔淡盱蠻豐融懿懿芬芬  
焱感黃龍兮燦訛碩鱗選巫咸兮叫帝閭開天庭兮延  
羣神儼暗靄兮降清壇瑞穰穰兮委如山於是事畢功  
弘回車而歸度三巒兮倡棠梨天閩決兮地垠開八荒  
協兮萬國諧登長平兮雷鼓磔天聲起兮勇士厲雲飛

揚兮雨滂沛于胥德兮麗萬世亂曰崇崇園丘隆隱天  
兮登降蒨施單堊垣兮增宮嶮差駢嵯峩兮嶺嶸嶙峴  
洞亡厓兮上天之緯杳旭卉兮聖皇穆穆信厥對兮徠  
祇郊禋神所依兮徘徊招搖靈遲遲兮輝光眩耀降厥  
福兮子子孫孫長亡極兮甘泉本因秦離宮既奢泰而  
武帝復增通天高光迎風宮外近則洪崖旁皇儲胥弩  
陸遠則石關封巒枝鵲露寒棠梨師得遊觀屈竒瑰偉  
非木摩而不彫牆塗而不畫周宣所考盤庚所遷夏卑

宮室唐虞椽椽三等之制也且其為已久矣非成帝所造欲諫則非時欲默而不能已故遂推而隆之乃上比於帝室紫宮若曰此非人力之所為黨鬼神可也又是時趙昭儀方大幸每上幸甘泉當法從在屬車間豹尾中故雄聊盛言車騎之衆參麗之駕非所以感動天地逆釐三神又言屏玉女卻宓妃以微戒齊肅之事賦成奏之天子異焉其三月將祭后土上乃帥羣臣橫大河湊汾陰既祭行游介山回安邑顧龍門覽鹽池登歷觀



陟西岳以望八荒迹殷周之虛眇然以思唐虞之風雄  
以為臨川羨魚不如歸而結網還上河東賦以勸其辭  
曰伊年暮春將瘞后土禮靈祇謁汾陰于東郊因茲以  
勒崇垂鴻發祥隕祉欽若神明者盛哉鑠乎越不可載  
已於是命羣臣齊法服整靈輿迺撫翠鳳之駕六先景  
之乘棹犇星之流旃彊天狼之威弧張耀日之玄旄揚  
左纛被雲梢奮電鞭驟雷輜鳴洪鐘建五旗羲和司日  
顏倫奉輿風發飈拂神騰鬼趨千乘霆亂萬騎屈橋噀

嘻旭旭天地稠莪黻邱跳巒涌渭躍涇秦神下龍言跼  
負沚河靈矍跼音掌華蹈衰遂臻陰宮穆穆肅肅蹲蹲  
如也靈祗既鄉五位時叙綢緼元黃將紹厥後於是靈  
輿安步周流容與以覽虜介山嗟文公而愍推兮勤大  
禹於龍門灑沈菑於豁瀆兮播九河於東瀕登歷觀而  
遙望兮聊浮流以經營樂往昔之遺風兮喜虞氏之所  
耕瞰帝唐之嵩高兮睎隆周之大寧汨低回而不能去  
兮行睨陔下與彭城濊南巢之坎坳兮易幽岐之夷平

乘翠龍而超河兮陟西岳之嶢嶠雲霏霏而來迎兮澤  
滲灑而下降鬱蕭條其幽藹兮滃汎沛以豐隆叱風伯  
於南北兮呵雨師於西東參天地而獨立兮廓蕩蕩其  
亡雙遵逝虘歸來以函夏之大漢兮彼曾何足與比功  
建乾坤之貞兆兮將悉總之以羣龍麗鈎芒與驂蓐收  
兮服元冥及祝融敦衆神使式道兮奮六經以攄頌隄  
於穆之輯熙兮過清廟之雖雖軼五帝之遐迹兮躡三  
皇之高蹤既發軔於平盈兮誰謂路遠而不能從其十

二月羽獵雄從以為昔在二帝三王宮館臺榭沼池苑  
園林麓藪澤財足以奉郊廟御賓客充庖廚而已不奪  
百姓膏腴穀土桑柘之地女有餘布男有餘粟國家殷  
富上下交足故甘露零其庭醴泉流其唐鳳凰巢其樹  
黃龍遊其沼麒麟臻其園神爵棲其林昔者禹任益虞  
而上下和少木茂成湯好田而天下用足文王園百里  
民以為尚小齊宣王園四十里民以為大裕民之與奪  
民也武帝廣開上林南至宜春鼎湖御宿昆吾旁南山

而西至長楊五柞北繞黃山瀕渭而東周衰數百里穿  
昆明池象滇河營建章鳳闕神明馭娑漸臺泰液象海  
水周流方丈瀛洲蓬萊游觀侈靡窮妙極麗雖頗割其  
三垂以贍齊民然至羽獵田車戎馬器械儲侍禁籞所  
營尚泰奢麗誇詡非堯舜成湯文王三驅之意也又恐  
後世復修前好不折中呂泉臺故聊因校獵賦以風其  
辭曰或稱戲農豈或帝王之彌文哉論者云否亦各並  
時而得宜奚必同條而共貫則秦山之封烏得七十而

有二儀是以創業垂統者俱不見其爽遐邇五三孰知

其是非遂作頌曰麗哉神聖處於玄宮富既與地虜侔  
訾貴正與天乎比崇齊桓曾不足使扶輶楚嚴未足以  
為驂乘陋三王之阨薜嶠高舉而大興歷五帝之寥廓  
涉三皇之登闕建道德以為師友仁義與為朋於是玄  
冬季月天地隆烈萬物權輿於內徂落於外帝將唯田  
于靈之囿開北垠受不周之制以終始顓頊玄冥之統  
迺詔虞人典澤東延昆鄰西馳闔闔儲積共恃戍卒夾

道斬叢棘夷野草禦自汧渭經營艷鎬章皇周流出入  
日月天與地杳爾迺虎路三峻以為司馬圍經百里而  
為殿門外則正南極海邪界虞淵鴻濛沆茫碣以崇山  
營合圍會然後先置虜白楊之南昆明靈沼之東賁育  
之倫蒙盾負羽杖鏑邪而羅者以萬計其餘荷垂天之  
畢張竟壅之罟靡日月之朱竿曳彗星之飛旗青雲為  
紛紅霓為纒屬之虜崑崙之虛渙若天星之羅浩如濤  
水之波淫淫與與前後要遮欖槍為闡明月為候熒惑

司命天弧發射鮮扁陸離駢衍佻路徽車輕武鴻網縶  
獵殷殷軫軫被陵緣阪窮冥極遠者相與迺乎高原之  
上羽騎營營眎分殊事繽紛往來輻輳不絕若光若滅  
者布虜青林之下於是天子乃以陽鼂始出乎玄宮撞  
鴻鐘建九旒六白虎載靈輿蚩尤並轂蒙公先驅立歷  
天之旗曳捎星之旃霹靂列缺吐火施鞭萃從允溶淋  
灑廓落戲八鎮而開關飛廉雲師吸嗅瀟率鱗羅布列  
攢以龍翰秋秋踰踰入西園切神光望平樂徑竹林蹂



蕙圃踐蘭唐舉爻烈火轡者施披方馳千駟校騎萬師

虓虎之陳從橫膠輻焱泣雷厲驥駢駘磔洶洶旭旭天

動地岷羨漫半散蕭條數千萬里外若夫壯士忼慨殊

鄉別趣東西南北騁者奔欲掎蒼豨跋犀犛蹶浮麋斲

巨狴搏元螭騰空虛距連卷蹕夭矯娛澗門莫莫紛紛

山谷為之風森林叢為之生塵乃至獲夷之徒蹶松栢

掌蒺藜獵蒙籠麟輕飛履般首帶脩蛇鈎赤豹揜象犀

跽巒阮超唐陂車騎雲會登降闔藹泰華為旒熊耳為

綴木仆山還漫若天外儲與虜大溥聊浪虜宇內於是  
天清日晏逢蒙列背羿氏控弦皇車幽輶光純天地望  
舒彌轡翼乎徐至於上蘭移圍徙陳浸淫斃部曲隊堅  
重各案行伍壁壘天旋神扶電擊逢之則碎近之則破  
鳥不及飛獸不得過軍驚師駭刮野掃地及至旱車飛  
揚武騎聿皇蹈飛豹絹噪陽追天寶出一方應駢聲擊  
流光埜盡山窮囊括其雌雄沈沈容容遙噓虜絳中三  
軍芒然窮兇闕與亶觀夫票禽之繼隃犀兕之抵觸熊

羆之拏攫虎豹之凌遽徒角搶題注蹙竦驚怖魂亡魄

失觸輻關脰妄發期中進退履獲創淫輪夷丘累陵聚

於是禽殫中衰相與集於靖冥之館以臨珍池灌以歧

梁溢以江河東瞰目盡西暢亡厓隨珠和氏焯爍其陂

玉石簪釜炫燿青熒漢女水潛怪物暗冥不可殫形玄

鸞孔雀翡翠垂榮王睢關關鴻雁嚶嚶羣娛虐其中噍

噍昆鳴鳧鷖振鷺上下砰磕聲若雷霆乃使文身之技

水格鱗蟲凌堅冰犯嚴淵探巖排碕薄索蛟螭蹈獮獺

據鼃鼃祛靈螭入洞穴出蒼梧乘鉅鱗騎京魚浮彭蠡  
目有虞方椎夜光之流離剖明月之珠胎鞭洛水之虛  
妃餉屈原與彭胥於茲虜鴻生鉅儒俄軒冕雜衣裳脩  
唐典匡雅俗捐讓於前昭光振燿蠻貊如神仁聲惠於  
北狄武義動於南鄰是以旃裘之王胡貉之長移珍來  
享抗手稱臣前入圍口後陳廬山羣公常伯楊朱墨翟  
之徒喟然稱曰崇哉乎德雖有唐虞大夏成周之隆何  
以侈茲大古之覲東嶽禪梁基舍此世也其誰與哉上

猶謙讓而未俞也方將上獵三靈之流下決醴泉之滋  
發黃龍之穴窺鳳凰之巢臨麒麟之囿幸神雀之林奢  
雲夢侈孟諸非章華是靈臺罕徂離宮而輟觀游土事  
不飾木功不彫承民乎農桑勸之以弗迨儕男女使莫  
違恐貧窮者不徧被洋溢之饒開禁苑散公儲創道德  
之囿弘仁惠之虞馳弋乎神明之囿覽觀乎羣臣之有  
亡放雉菟收罝罟麋鹿芻蕘與百姓共之蓋所以臻茲  
也於是醇洪鬯之德豐茂世之規加勞三皇勗勤五帝

不亦至乎乃祇莊雍穆之徒立君臣之節崇賢聖之業  
未皇苑囿之麗游獵之靡也因回軫還衡背阿房反未  
央明年上將大誇胡人以多禽獸秋命右扶風發民入  
南山西自褒斜東至弘農南毆漢中張羅罔置罝罾捕  
熊羆豪猪虎豹狄獾狐兔麋鹿載以檻車輸長楊射熊  
館以罔為周陸縱禽獸於其中令胡人手搏之自取其  
獲上親臨觀焉是時農民不得收斂雄從至射熊館還  
上長楊賦聊因筆墨之成文章故藉翰林以為主人子

墨為客卿以風其辭曰子墨客卿問於翰林主人曰蓋  
聞聖主之養民也仁霑而恩洽動不為身今年獵長楊  
先命右扶風左太華而右褭斜椽截薛而為弋紆南山  
以為罝羅千乘於林莽列萬騎於山隅帥軍蹕陸錫戎  
獲胡搯熊羆柁豪豬木雍槍纍以為儲胥此天下之窮  
覽極觀也雖然亦頗擾乎農民三旬有餘其厯至矣而  
功不圖恐不識者外之則以為娛樂之遊內之則不以  
為乾豆之事豈為民乎哉且人君以玄默為神澹泊為

德今樂遠出以露威靈數搖動以罷車甲本非人主之  
急務也蒙竊惑焉翰林主人曰吁謂之茲邪若客所謂  
知其一未睹其二見其外不識其內者也僕嘗倦談不  
能一二其詳請略舉凡而客自覽其切焉客曰唯唯主  
人曰昔有彊秦封豕其士窶窳其民鑿齒之徒相與摩  
牙而爭之豪俊麋沸雲擾羣黎為之不康於是上帝眷  
顧高祖高祖奉命順斗極運天關橫鉅海票崑崙提劍  
而叱之所麾城擗邑下將降旗一日之戰不可殫記當



此之勤頭蓬不暇疏飢不及餐鞮螿生蟻虱介冑被霑  
汗以為萬姓請命虐皇天迺展民之所詘振民之所乏  
規億載恢帝業七年之間而天下密如也逮至聖文隨  
風乘流方垂意於志寧躬服節儉綈衣不敝革鞞不穿  
大夏不居木器無文於是後宮賤瑇瑁而踈珠璣卻翡  
翠之飾除雕琢之巧惡麗靡而不近斥芬芳而不御抑  
止絲竹晏衍之樂憎聞鄭衛幼眇之聲是以玉衡正而  
太階平也其後熏鬻作虐東夷橫畔羗戎睚眦閩越相

亂遐萌為之不安中國蒙被其難於是聖武勃怒爰整  
其旅廼命驃衛汾沅沸渭雲合電發焱騰波流機駭螽  
軼疾如奔星擊如雷霆砰輶輻破穹廬腦幕沙髓余吾  
遂獵乎王庭毆橐它燒燼螽分黎單于磔裂屬國夷阮  
谷拔鹵莽刊山石蹂屍輿廝係累老弱究鋌癥耆金鏃  
淫夷者數十萬人皆稽首樹頷扶服蛾伏二十餘年矣  
尚不敢惕息夫天兵四臨幽都先加回戈邪指南越相  
夷靡節西征羌燹東馳是以遐方疏俗殊鄰絕黨之域

自上仁所不化茂德所不綏莫不躋足抗手請獻厥珍  
使海內澹然永亡邊城之災金革之患今朝廷純仁遵  
道顯義并包書林聖風雲靡英華沈浮洋溢八區普天  
所覆莫不沾濡士有不談王道者則樵夫笑之故意者  
以為事罔隆而不殺物靡盛而不虧故平不肆險安不  
忘危迺時以有年出兵整輿竦戎振師五祚習馬長楊  
簡力狡獸校武票禽迺幸然登南山瞰烏弋西厭月蝟  
東震日域又恐後世迷於一時之事常以此為國家之

大務淫荒田獵陵夷而不禦也是以車不安軻日未靡  
旃從者彷彿翫屬而還亦所以奉太宗之烈遵文武之  
度復三王之田反五帝之虞使農不輟耰工不下機婚  
姻以時男女莫違出愷悌行簡易矜劬勞休力役見百  
年存孤弱帥與之同苦樂然後陳鐘鼓之樂鳴鞀磬之  
和建碣磬之虞拈隔鳴球掉八列之舞酌允鑠肴樂胥  
聽廟中之雍雍受神人之福祐歌投頌吹合雅其勤若  
此故真神之所勞也方將俟元符以禪梁父之基增泰

山之高延光于將來比榮乎往號豈徒欲淫覽浮觀馳  
騁稷稻之地周流梨粟之林蹂踐芻蕘誇詡衆庶盛狢  
攫之收多麋鹿之獲哉且盲者不見咫尺而離婁燭千  
里之隅客徒愛胡人之獲我禽獸曾不知我亦已獲其  
王侯言未卒墨客降席再拜稽首曰大哉體乎允非小  
子之所能及也迺今日發矇廓然已昭矣哀帝時丁傅  
董賢用事諸附離之者或起家至二千石時雄方草太  
玄有以自守泊如也或譎雄以玄尚白而雄解之號曰

解嘲其辭曰客嘲揚子曰吾聞上世之士人網人紀不生則已生則上尊人君下榮父母折人之圭儋人之爵懷人之符分人之祿紆青拖紫丹朱其轂今子幸得遭明盛之世處不諱之朝與羣賢同行歷金門上玉堂有日矣曾不能畫一竒出一策上說人主下談公卿目如燿星舌如電光壹縱壹橫論者莫當顧而作太玄五千文枝葉扶疎獨說十餘萬言深者入黃泉高者出蒼天大者含元氣纖者入無倫然而位不過侍郎擢纔給事

黃門意者玄得毋尚白乎何為官之拓落也揚子笑而  
應之曰客徒欲朱丹吾轂不知一跌將赤吾之族也往  
者周罔解結羣鹿爭逸離為十二合為六七四分五剖  
並為戰國士無常君國無定臣得士者富失士者貧矯  
翼厲翮恣意所存故士或自盛以橐或鑿坏以遁是故  
騶衍以頡亢而取世資孟軻雖連蹇猶為萬乘師今大  
漢左東海右渠搜前番禺後陶塗東南一尉西北一候  
徽以糾墨制以質鈇散以禮樂風以詩書曠以歲月結

以倚廬天下之士雷動雲合魚鱗雜襲咸營乎八區家  
家自以為稷契人人自以為咎繇戴縱垂纓而談者皆  
擬於阿衡五尺童子羞比晏嬰與夷吾當塗者入青雲  
失路者委溝渠旦握權則為卿相夕失執則為匹夫譬  
若江湖之雀勃解之鳥乘鴈集不為之多雙鳧飛不為  
之少昔三仁去而殷虛二老歸而周熾子胥死而吳亡  
種蠡存而粵伯五穀入而秦喜樂毅出而燕懼范雎以  
折摺而危穰侯蔡澤雖噤吟而笑唐舉故當其有事也



非蕭曹子房平勃樊霍則不能安當其亡事也章句之徒相與坐而守之亦亡所患故世亂則聖哲馳騫而不足世治則庸夫高枕而有餘夫上世之士或解縛而相或釋褐而傅或倚夷門而笑或橫江潭而漁或七十說而不遇或立談間而封侯或枉千乘於陋巷或擁帚彗而先驅是以士頗得信其舌而奮其筆室隙蹈瑕而無所誣也當今縣令不請士郡守不迎師羣卿不揖客將相不俛眉言竒者見疑行殊者得辟是以欲談者宛舌

而固聲欲行者擬足而投迹鄉使上世之士處處今策  
非甲科行非孝廉舉非方正獨可抗疏時道是非高得  
待詔下觸間罷又安得青紫且吾聞之也炎炎者滅隆  
隆者絕觀雷觀火為盈為實天收其聲地藏其熱高明  
之家鬼瞰其室攫拏者亡默默者存位極者宗危自守  
者身全是故知玄知默守道之極爰清爰靜遊神之廷  
惟寂惟寞守德之宅世異事變人道不殊彼我易時未  
知何如而子迺以鷓臬而笑鳳凰執螻蛄而嘲龜龍不

亦病乎子徒笑我玄之尚白吾亦笑子之病甚不遭與  
跼扁鵲悲夫客曰然則靡玄無所成名乎范蔡以下何  
必玄哉揚子曰范雎魏之亡命也折脅拉髀免於徽索  
翕肩蹈背扶服入橐激印萬乘之主界涇陽抵穰侯而  
代之當也蔡澤山東之匹夫也頓頤折額涕垂流沫西  
揖彊秦之相搯其咽炕其氣拊其背而奪其位時也天  
下已定金革已平都於雒陽婁敬委輅脫輓掉三寸之  
舌建不拔之策舉中國徙之長安適也五帝垂典三王

傳禮百世不易叔孫通起於桴鼓之間解甲投戈遂作君臣之儀得也甫刑靡敝秦法酷烈聖漢權制而蕭何造律宜也故有造蕭何律於唐虞之世則諄矣有作叔孫通儀於夏殷之時則惑矣有建婁敬之策於成周之世則謬矣有談范蔡之說於金張許史之間則狂矣夫蕭規曹隨留侯畫策陳平出奇功若泰山嚮若阨隕唯其人之瞻知哉亦會其時之可為也故為可為於可為之時則從為不可為於不可為之時則凶夫藺先生收

功於章臺四皓采榮於南山公孫創業於金馬驃騎發  
迹於祁連司馬長卿竊訾於卓氏東方朔割名於細君  
僕誠不能與此數公者並故默然獨守吾太玄雄以為  
賦者將以風之必推類而言極麗靡之辭閎侈鉅衍競  
於使人不能加也既迺歸之於正然覽者已過矣往時  
武帝好神仙相如上大人賦欲以風帝反縹縹有陵雲  
之志繇是言之賦勸而不止明矣又頗似俳優淳于髡  
優孟之徒非法度所存賢人君子詩賦之正也於是輟

不復為而大潭思渾天參摹而四分之極於八十一旁  
則三摹九据極之七百二十九贊亦自然之道也故觀  
易者見其卦而名之觀玄者數其畫而定之玄首四重  
者非卦也數也其用自天玄推一晝一夜陰陽數度律  
歷之紀九九大運與天終始故玄三方九州二十七部  
八十一家二百四十三表七百二十九贊分為三卷曰  
一二三與泰初歷相應亦有顛項之歷焉搯之以三策  
開之以休咎緝之以象類播之以人事文之以五行擬

之以道德仁義禮知無主無名要合五經苟非其事文  
不虛生為其泰曼漙而不可知故有首衝錯測攤瑩數  
文捫圖告十一篇皆以解剝玄體離散其文章句尚不  
存焉玄文多故不著觀之者難知學之者難成客有難  
玄太深衆人之不好也雄解之號曰解難其辭曰客難  
揚子曰凡著書者衆人之所好也美味期乎合口工聲  
調於比耳今吾子乃抗辭幽說閤意眇指獨馳騁於有  
亡之際而陶冶大鑪旁薄羣生歷覽者滋年矣而殊不

寤宜費精神於此而煩學者於彼譬畫者畫於無形弦者放於無聲殆不可乎揚子曰俞若夫闕言崇議幽微之塗蓋難與覽者同也昔人有觀象於天視度於地察法於人者天麗且彌地普而深昔人之辭迺玉迺金彼豈好為艱難哉執不得已也獨不見夫翠蚪絳螭之將登虜天必聳身於蒼梧之淵不階浮雲翼疾風虛舉而上升則不能擗膠葛騰九閼日月之經不千里則不能燭六合耀八紘泰山之高不嶠嶢則不能滄滄雲而散



歌烝是以宓犧氏之作易也縣絡天地經以八卦文王  
附六爻孔子錯其象而彖其辭然後發天地之藏定萬  
物之基典謨之篇雅頌之聲不溫純深潤則不足以揚  
鴻烈而章緝熙蓋胥靡為宰寂寞為尸大味必淡大音  
必希大語叫叫大道低回是以聲之眇者不可同於衆  
人之耳形之美者不可混於世俗之目辭之衍者不可  
齊於庸人之聽今夫弦者高張急徽追趨逐者則坐者  
不期而附試為之施咸池掄六莖發簫韶詠九成則莫

有和也是故鍾期死百牙絕弦破琴而不肯與衆鼓獲  
人亡則匠石輟斤而不敢妄斲師曠之調鐘竦知音者  
之在後也孔子作春秋幾君子之前睹也老聃有遺言  
貴知我者希此非其操與雄見諸子各以知其舛馳大  
氏詆訾聖人即為怪迂折辯詭辭以撓世事雖小辯終  
破大道而惑衆使溺於所聞而不自知其非也及太史  
公記六國歷楚漢訖麟止不與聖人同是非頗謬於經  
故人有問雄者常用法應之譔以為十三卷象論語號

曰法言文多不錄史氏著其目云漢史贊曰雄之自序

云爾

自號曰法言之前皆是雄本自序之文也

初雄年四十餘自蜀來游京

師大司馬車騎將軍王音奇其文雅召以為門下史薦  
雄待詔歲餘奏羽獵賦除為郎給事黃門與王莽劉歆  
並哀帝之初又與董賢同官當成哀平間莽賢皆為三  
公權傾人主所薦莫不拔擢而雄三世不徙官及莽篡  
位談說之士用符命稱功德獲封爵者甚衆雄復不侯  
以耆老久次轉為大夫恬於執利乃如是實好古而樂

道其意欲求文章成名於後世以為經莫大於易故作  
太玄傳莫大於論語作法言史篇莫善於蒼頡作訓纂  
箴莫善於虞箴作州箴賦莫善於離騷反而廣之辭莫  
善於相如作四賦皆斟酌其本相與放依而馳騁云用  
心於內不求於外於時人皆忽之惟劉歆及范滂重焉  
而桓譚以為絕倫王莽時劉歆甄豐皆為上公莽既以  
符命自立即位之後欲絕其原以神前事而豐子尋歆  
子棻復獻之莽誅豐父子投棻四裔辭所連及便收不

請時雄校書天祿閣上治獄事使者來欲收雄恐不能自免乃從閣上自投下幾死莽聞之曰雄素不與事何故在此間請問其故乃劉棻嘗從雄學作竒字雄不知情有詔勿問然京師為之語曰惟寂寞自投閣爰清靜作符命雄以病免復召為大夫家貧嗜酒人希至其門時有好事者載酒肴從游學而鉅鹿侯芭常從雄居受其太玄法言焉劉歆亦嘗觀之謂雄曰空自苦今學者有祿利然尚不能明易又如玄何吾恐後人用覆醬

翫也雄笑而不應年七十一天鳳五年卒侯芭為起墳喪之三年時大司空王邑納言嚴尤聞雄死謂桓譚曰子常稱揚雄書豈能傳於後世乎譚曰必傳顧君與譚不及見也凡人賤近而貴遠親見揚子雲祿位容貌不能動人故輕其書昔老聃著虛無之言兩篇薄仁義非禮學然後世好之者尚以為過於五經自漢文景之君及司馬遷皆有是言今揚子之書文義至深而論不詭於聖人若使遭遇時君更閱賢知為所稱善則必度越

諸子矣諸儒或譏以為雄非聖人而作經猶春秋吳楚之君僭號稱王蓋誅絕之罪也自雄之沒至今四十餘年其法言大行而玄終不顯然篇籍具存

通志卷一百二下





總校官庶吉士臣侍朝

校對官助教臣金學詩

騰錄監生臣宗鐸